





德保姓索保格氏字仲容歸定圖滿州正白旗人乾隆丁巳進士官至

禮部尚書有樂墮堂集

按據庚申中世文編姓名德目

按德公為視伯名德憲之弟德憲名視保字伯容歸補身乾隆丁巳進士官

禮部尚書右憲左都御史見昭代名人傳續編傳兩皇同懷試同科仕同官

六十一時三佳稿中

野史亭箋

耳溪散稿序

鄭樵有言瞿曇之書能至諸夏而宣尼之書

跋提河聲音之道有障礙耳此似是而不盡然也夫

地員九萬國土至多自其異者言之豈但聲音障

即文字亦障礙自其同者言之則殊方絕域有不同

之文字而無不同之性情亦無不同之義理故凡宣

暢性情辨別義理者雖宛轉重譯而意皆可明見於

經者春秋傳載戎子駒支自云言語不通而能賦青

蠅是中夏之文章可通於外國見於史者東觀漢記

載白狼王慕德諸歌具註譯語是外國之文章亦可

通於中夏况乎文字本同者其所著作又何中外之



殊哉特工拙得失視其人之自為耳唐武平一景龍
文館記載中宗正月五日蓬萊宮聯句有吐蕃舍人
明悉獵今金川以及廓爾喀其故地也竟無能繼者
宋計敏夫唐詩紀事載南詔國王驃信與其清平官
等唱和今緬甸其故地也亦無能繼者其同文之國
納贄獻琛得簪筆 彤墀賡颺 天藻者惟朝鮮琉
球安南而篇什華贍上邀 睿賞惟朝鮮為多其詩
文集傳入中原者亦朝鮮為最夥余兩掌春官職典
屬國所見不能縷數也乾隆甲寅冬判中樞府事洪
君漢師以職貢來京師器宇深重知為君子既而知
其先以庚寅奉使與德定圃尚書博晰齋洗馬戴蓮

士修撰遞相唱和與之語聲音障礙如鄭樵之所云
索其詩因出所著耳溪集五卷求余為序近體有中
唐遺響五言吐詞天拔秀削絕人可位置馬戴劉長
卿間七言亮節微情與江東丁卯二集亦相伯仲七
言古體縱橫似東坡而平易近人足資勸戒又多如
白傅大抵和平溫厚無才人妍媚之態又民生國計
念念不忘亦無名士放誕風流之氣觀其文集中有
與人論詩數篇往往能洞見根柢深究流別宜其醞
釀深厚葩采自流所謂詩人之詩異乎詞人之詩矣
余天性孤峭雅不喜文社詩壇互相標榜第念文章
之患莫大乎門戶元遺山詩曰鄴下曹劉氣儘豪江

東諸謝韻尤高若從華實評詩品未便吳儂得錦袍
此以疆域爭門戶也劉後村詩曰書如逐客猶遭黜
詞取橫汾亦恐非箏笛安能諧雅樂綺羅原未識深
衣此以學術爭門戶也朋黨之見君子病焉朝鮮距
京畿最近內屬最早奉職貢最虔沐浴醲化亦最
久聖朝六合一家已視猶閩閩貢使文章又有志
於古作者如區分畛域置之不道是所見與門戶等
豈王道蕩蕩無偏無黨之意哉因為書數行弁於
簡首俾四瀛以外知詩也者發乎情止乎禮義此心
此理含識皆同非聲音文字之殊所能障礙共相傳
習一如朝鮮之儒雅文德之敷其益恢益遠矣乎

乾隆甲寅仲冬河間紀昀題於京寓

耳溪散稿卷之一

朝鮮耳溪洪良浩漢師



西海詩

遊廣石濯熱亭次板上韻

刺史初行野逶迤小隊閑出城無咫尺臨海有溪山
盡戟幽花外清詩翠壁間夕陽人影散棲鳥與俱還

七夕病起

牛女相逢日湖山獨卧身病餘扶杖起秋色入簾新
井葉應飄恨池花已損神登樓看月好挾瑟有佳人

雨中發海州向延安

火星西北流驅馬向益州海氣無殘暑山光欲早秋

觀風知政拙省野減民憂却有隨車雨如教使節留
既望往許氏挹清亭

一壑林亭古西州獨擅名溪山無定主旂纛有閑行
月色隨潮滿龍吟應笛清高謔扶醉返官樹暝煙生
芙蓉堂中秋賞月

玉宇淒清白露秋踈簾月色近人流樓如碧蜃波中
湧身似靈龜葉上遊超忽便應生羽化虛明聊復與
神謀可憐數朵殘荷在猶送香風水面浮

中秋翼日發東巡向黃州

刺史東行縣秋風駟騎豪海雲隨玉節霜日照金刀
野濶羣山小天清一鴈高來宣民事急原隰敢言勞

廿一日入峽夜抵遂州

荒荒日欲暝立馬山之阿峽氣晴猶濕溪聲夜更多
流螢隨畫燭行吹雜樵歌官舍應非遠雙旌出薜蘿

廿二踰葱嶺向谷山

秋雨初晴日色妍臨風攬轡意翛然雲開衆壑皆呈
面天遠孤峯似聳肩高興不堪搔白首清詩何處喚
青蓮腰間紫綬翻爲累旗纛紛紛導馬前

廿三發谷山宿檢勿院頗有溪山

秋氣清如此豪情不可刪白雲何處寺紅葉幾重山
轉覺風光好渾忘道路艱偶逢佳水石立馬聽潺湲
入平山界

原隰行無盡關河路轉遙村娥青帕首郵卒紫纏腰
山野還殊俗憂歡各自謠攀轅多父老慙愧詠膏苗
升五午憇岐灘臨江有清致

峽轉猶通瀨沙平忽聞聲江流紅葉下橋斷小舟橫
魚稻生涯足巖巒氣色清停車初把酒深樹一鷄鳴

過憇金郊清籟亭贈主人

迴車紅樹裏留客夕陽時倚檻生虛籟移樽近小池
馬肥秋放野丞傲日哦詩偶到仍成趣行旌出洞遲

登太白山城

鉄鉞上崢嶸東臨太白城江山生暮色鼓角動秋聲
天設金湯壯人傳鐵像名千旂橫路左弩矢使君迎

秋思

山館徂秋夜寒燈耿不明蟲聲何太急稍稍近床鳴
升八溫泉館夜枕聞雨

日落荒村裏燈明獨卧時林蟲如訴恨簷雨更催詩
霜露秋生感雲天夜有思百憂悄無寐山漏問何其

過潔浦觀潮

碧城初罷霧潔浦又生濤海氣層雲積潮聲衆竅號
蛟龍應自大島嶼不能高攬轡凝遐想飄如御六鰲

九月初六發西巡

東巡今幾日旋節又徂西左夾滄溟濶回看碧岫低
清霜初滌野涼雨忽生霓官路平如砥征驂不怯泥

途中晚雨晴

秋山晴更好餘靄澹清霄
恠鳥啼相送寒花影自搖
馬嘶紅樹巷僧渡夕陽橋
滿目皆堪畫其如畫未描

石潭書院

河嶽曾生傑亭臺儼若神
聖門全體學王室匪躬
臣九曲天鍾美諸賢德有隣
潭心留片月長照詠歸人

七日曉發石潭冒雨向松禾

秋雨苦無已我行殊未央
海雲多譎詭風葉太蒼黃
征役悲年邁厨傳愧歲荒
直緣王事急啓處亦靡
遑

八月早發嘉禾向儒州

錦嶂初收雨蘋洲更起風
鴈聲遙度海鵬翮直摩空
氣候朝晡異天機物我同
孤吟還自罷寥濶意無窮

望九月山

磅礴流元氣西蟠九月山
中天高一柱平地列千巒
蒸潤功應博端嚴意自閒
秋風還駐節瞻望未躋攀

暮入岳州

驛路黃花發山城畫角哀
此身同候鴈春去又秋來

九日以試士留岳州

水國霜清木葉殷流光冉冉道途間
客中偶值重陽日天外還看九月山
雲樹遠遮千里目茱萸那駐少

年顏佳人唱勸黃花酒醉上高樓月欲彎

岳州感古

吾祖分符地今孫仗節來陽春千室化山浦百年哀
片石新華屋寒花舊釣臺欲招遺老盡孤月與徘徊

題楊山館

岳州大都會旋節再來過天入西溟盡星從北極多
清秋長作客中夜一高歌歲暮親朋遠芳樽奈爾何
落葉

恠底千林綠秋來每自催着霜渾似醉鳴雨却成哀
箇箇隨風轉輕輕擲水迴縱知乘化理應愧後凋材
太極亭

浩浩窺無外玄玄鑽更微環中元不動磨上互相依
一氣盈虛谷羣生出入機圖書言未了千載與誰歸

見饑民周急勸農

方岳元承化旬宣亦順時昆蟲皆自動鰥寡得無飢
頻奉勸農詔多慚膏雨詩博施從古病鄭產即吾師

自龍泉向峽龍泉瑞興號

入峽猶殘雪溪山未見奇節過寒食久花較去年遲
陽氣禽先得春容桺始爲村謠時助興題墨或成詩

峽中即事

小輿雲外出天地此身高古壁流蜂液陰龕養石膏
村猶逢虎狎山鼠見人逃供眼多奇事崎嶇未覺勞

十六躡新塘嶺

便疑天漸近堪笑首頻搔山木尖如蝟輿僧捷似猿
鳥飛唯見背人去共攀尻絕頂宜遐眺猶嫌坐不牢

望象山 山谷山號

最愛山中郡風謠亦可詫獵夫供雉羽峒戶買蜂窠
衣食非難足飛潛各自和從此民牒簡拄笏但高哦

春寒

二月寒猶壯東君造化奇桺眠驚雪冷鳥語惱花遲
小酒還多力輕衫却見欺神權聊一戲非是傲天時

晦日宿新溪向兔山

半醉丹溪酒行穿碧磴蘿寒知花意懶春在鳥聲多

馬上聽牛訟山頭奏饁歌觀風聊可喜豪興奈吾何

兔山金川兩境有小江名古棧頗有幽趣

峽束纔通路灘開遂放流一江分兩縣千室共孤舟
地僻能馴鹿春深始見鷗清幽頗可悅到此一開眸

三月初吉兔山三聖臺

一片高臺倚古楂孤烟隔樹兩三家風帆載去漢江
米春水浮來伊峽花樓影靜時龍卧穩夕陽明處鷺
飛斜西州千里觀遊遍此地登臨興最誇

省麥

犁星當夜見昴宿次昏中麥喜勾芒雨花猜少女風
民情依月糶天氣占年豐 聖化方春遠從知八域

同

午憇金川曲洞向平山

驅車還出峽春色正嬋娟帶雨花如醉當風柳不眠
孤烟生遠戍流水入平田始覺韶光好牽帷意豁然

到平州

東陽古重鎮西路一防營劍倚將軍壁旗翻太白城
春風來戰地兵氣散江聲 聖代方歸馬元戎且省
耕

卽事

觀風非一事生業揔堪憐村女分蚕種山僧訟楮田
大都皆食力聊爾各隨緣安得粟如土斯民不愛錢

初二午炊江陰向白川

江陰故小縣門外卽通船薪送長安桂魚求上峽錢
行人歸暮雨棧路俯江天半日沿流去金川至白川

路中得舍弟書聞以明日如期會延安

有誰傳片紙立馬雨中看吾弟戴丹桂今朝過碧瀾
他鄉驚會合長路喜平安不是鹽州遠還愁度夜難

新晴

春陰何太久晴罷日濛濛衆水歸滄海浮雲散碧空
鳥啼前夜雨花困夕陽風萬象雖多變同遊元氣中

與注書及判官金郵登南山觀劍舞

萬舞山之崗羣峰勢欲翔劍搖滄海色花散滿城香

包絡樓譙壯風流江漢長笙歌扶醉返草木被
光 恩

李春望日發西巡向載鳳大野

驅車春色裏佳氣遠連天滄海晴無浪平原煖有煙
吹來寒燒綠粧却醜巖妍好是巡宣路風光正藹然
十六日宿正方山城伽藍

平地山如湧呀然石扇通鷄鳴千嶂裏僧立百花中
天險藏兵食神光繞佛宮雄城還淨界瀟灑坐元戎

渡三枝河載寧地

青青隴上麥白白沙中鷗行邁春風遠薰蒸土氣浮
數家臨古渡斜日有孤舟暗聽蒿師語明朝向沮流

春望

誰家春可畫吾恐畫難傳細草牛雙角晴臯鶴一拳
花深山欲醉日暖野如眠前路知何處斜陽數抹煙
十八午炊升州終日野行

盡日巡原野觀農未覺勞自慚春有脚那得雨如膏
南畝初耕秣前溪已放桃此行田畷似堪笑擁旗旄
自嘉禾向長淵

嘉禾雖小縣膏壤帶長堤春色三分暮秋蕪數寸齊
軟沙翻錦翼芳草散花蹄儉歲猶豐樂陽和獨海西
過長淵憶申舜民簡寄北青任所

別後春重到清樽對典刑花鬚如我白桺眼向人青

片月應同照歸雲故自停尺書無鴈寄兩地各滄溟

阿郎浦

世傳新羅西郎遊賞處

東瀛三日浦西海四郎臺仙去雲猶在春還潮自來
岸花依舊發漁蘧至今哀渺渺思公子蘭蘋薦一杯

金沙寺海月樓觀劍舞

春宵張畫燭歌舞出禪房海靜龍沉影星垂佛放光
松間留劍氣花下散杯香此會真奇絕他時定不忘

廿二日登金沙峰觀海

醉倚金沙巔西溟把盞前日兼雲共蕩天與海俱圓
若木知何樹青齊或見煙心腦元自在毛骨却翛然

長山串

長山天下險橫海碧嶙峋賽鬼占風色招魂哭水濱
浦魚時化鹿木客暗欺人安得龍門斧中開利涉津

大小青島

青青水中島鏡面橫雙着常恐脚根弱終無拳石移
霧時皺容乍晴處浚粧爲隔海空相望迢迢有所思

望登萊

我國西環水華人謂大瀛魯連夸一死秦帝羨長生
三山非別界千古冒虛名癡夢真堪笑題詩代史評

廿四日朝發向瓮津

一名遷

適馬淹倉舍回車向瓮遷梨花含夜雨柳絮散朝煙
海上多新句春光勝去年微風送征蓋官路草芊芊

洗劍樓

衆山西入海包絡壯關防城壓魚龍氣樓涵日月光
齊烟連戍火蠻舶雜漁檣酒半談邊略元戎鬢髮蒼
廿五日遍巡沿海漫題

周遊皆澤國物產異東西森菜青絲角鮮羹紫絡蹄
含醪海蔘醉噴浪水牛嘶風雅稱多識虫魚入品題
孟夏泛潔浦抵兄弟巖望睡鴨島

天晴好泛鷁沙暖不驚濤解纜春風遠齊橈碧水高
波臣迎鼓角鷗陣對旌旄向晚擢歌起篙工意自豪

又
放舟凌巨浪橫遂立中流舞蹴驪龍背樽開睡鴨頭

重天應在下大界却同浮仰視蒼蒼處紅輪轉似毬

又

日斜風稍起灘急水回流潮落猶藏石魚跳不上舟
長洲俄近遠孤島忽沉浮騶御還從簡清閑勝去秋

又

鼓角三聲盡鷁催澄湖百里錦帆開青山盡似波中
出白鳥時從雲際來便覺冷風生兩腋還將勺水較
淡盃西湖始信同西子竟日留人不放回

首陽山城用前韻

遠見千峯合中尋一線分層巖危欲擲孤雉聳如奔
虎跡懸蒼蘚鷄聲在白雲俯臨皆蟻垤特立與誰羣

雨後遊屏巖

龍首牛耳皆山名

龍首連牛耳巖扃兩壁開
鶴分山翠立僧與水聲來
細瀑調琴曲流霞泛酒盃
夕陽雲去盡樵筵背林回
病中聽琴歌

卧病首陽館閑聽肉與絲
初翻將進酒還奏步虛詞
細語指間動深情看上知
階前雙白鶴飛舞若相期
芙蓉堂雜詠

池邊時曳杖樓上或開衙
獨酌賢人酒閑看君子花
醉毫多偃仰風幘自敲斜
官舍清如許神仙定不遐
又

芙蓉初出水照日何輕盈
魚在香中活船從葉上行

形神渾與化肝肺亦應清
倚棹凝遐想冷風滿袖生
又

荷葉碧於水童童擁畫楹
錢高知雨過珠動覺魚行
久坐渾如醉將歸每有情
無風香自起向夜不勝清
又

夜深羣籟定隱几更翛然
池淨看疑月欄危坐似船
魚隨樓上笛花倒水中天
却笑東坡子何須慕挾仙
又

雨後偏多月樓前况有池
星河光錯落簾閣影參差
水漲荷俱上船行魚不知
中流採菱去香露濕淋漓
又

小棹隨明月沿洄破殼紋歌聲樓底出人語葉間聞
照水羞紅臉翻風失翠裙不知香起處衣袖自氤氳
八月十二日發東巡登首陽城東將臺用前韻
肩輿上絕頂盤互路微分踏石生空響披林起宿雲
水環諸島凸天迴萬山奔舉目無他物蒼茫鴈數羣

鳳山台城大野

清秋動征蓋長路抗高牙野粟黃金粒山綿白雪花
川原多氣色邛落自繁華始覺民憂減觀風亦可誇

八月廿五還營登荷堂

乍別芙蓉堂池臺夜有霜敗荷留半綠虛檻濕餘香
不復來看月悠然獨引觴明年花發日回想在何方

過文化大野向安岳

儒州岳州間川抱野如環天入蒼蒼樹雲開點點山
清秋宜縱目微雨倍生顏此地凡三到今行始覺閒

九月旬日入九月山

昨把重陽酒今登九月山艱難行樹杪倏忽在雲間
疊岫橫高髻孤城掛大環陞皇應咫尺絕頂更躋攀

又

竒峯已在目棧路劇透迤山翠生僧背秋光上客看
夕陽明錦繡空瀑轉琉璃此地多仙跡樵童莫看棋

登上臺

攀援未覺疲孤絕不勝危俯視雲千變回看天四垂

海窮目到處風動神來時正色蒼蒼是憑虛始獨知
下山向殷栗停轂寺

斜日下山去西峯氣益佳逕危猶恃杖磴小劣容鞋
行處風常積過時雲已霾塵緣嗟未斷回首有餘懷

望德亭觀海

元氣包無外寰中海是宗羣山皆自止衆水盡相逢
日月時休沐江河屬附庸斟量誰可較惟有大心胸
朝天館觀劍舞留奉主人

獨倚黃華館無人勸酒留峯頭初餞日天末又徂秋
劍氣星沉海潮聲夜撼樓題詩和菊露非直瀉邊愁
宿海州西倉十四日冒雨向蘇江途吟

征邁一旬半流光九月中秋陰先送雨潮信自生風
戍鼓迎行角星軒逐去篷海隅徂聖節頻覺首回
東

夜宿宣威堂聞風雨聲

江城秋擊柝江雨夜鳴雷風自虛中起聲從激處來
枕邊龍欲吼雲外鴈俱哀悵望燕齊近高歌意不裁
乘月登洗劍樓

寶劍臨秋水危樓倚半天戍烟千丈直山月九分圓
痛飲須今夕高歌惜暮年時平卧刁斗城下繫漁船
望日與水伯麟丞泛舟挽河亭下

半醉黃花酒同登赤壁舟江山逢我輩歌管屬清秋

潮落沙圍島帆高日隱洲佳人唱未闕停棹在中流

既望夜泛月荷池

玉露秋生菊金樽夜泛池天隨樓共轉雲與月俱馳
弄遂聲相引穿橋影更奇偷閑聊遣興却恐外人知

神光寺

古壁看千佛高窓對萬峯樽開紅樹岸飯及夕陽鐘
落葉風相擊飛泉夜自舂騎驢還出洞回首白雲封

十月三日以回還陳奏使迎候發向黃州

秋盡猶行役山河氣更清今朝霜似雪是夜月生明
木落寒江急天低暮岫橫燕槎消息近何處把杯迎

泛月江南復用樓字

赤壁今茲州三秋再泛舟古人不可見良夜復清遊
水落魚歸壑山高月在樓縱無蘓子賦簫鼓亦風流

別芙蓉堂

征車已載脂徙倚下樓遲人去詩猶在琴歸鶴未隨
香殘蓮葉酒唱罷竹枝詞最是難忘處花明月白時

所養雙白鶴臨歸欲放之羽鍛不能飛留付花奴故頸聯云

到金川交龜發向松都

當面交朱紱隨身有弊裘都輸二千石全付卅三州
驛路寒雲積離亭暮角愁三盃拂衣去詩滿海山秋

耳溪散稿卷之一終

耳溪散稿卷之二

朝鮮豐山洪良浩漢師著

北關詩

掛弓松

在咸興本宮後庭中曾於壬辰之亂倭賊斧斫一枝鮮血迸出風雷大作賊徒驚散不敢復近云

掛弓松乃在咸州之本宮云是 聖祖手所植尚餘
三株後庭中亭亭偃蓋蔭十畝上有光恠干碧穹龍
拏席蹲勢欲騰柯如蒼玉根如桐雪峯山下馳馬歸
三尺烏號掛如虹枝頭嫋嫋上弦月葉間瑟瑟帶箭
風南征北伐倚神器鳥喙勢面無全瞳弧矢方佯數

十載天地清夷日域東威加宇內眷故鄉仙蹕重來
似舊豐鑿聲兮噦噦翠蓋兮童童清陰芳草宴父老
大風之歌何颯颯祥雲長繞萬年枝古幹扶踈立穹
窿往歲島夷犯大邦興王舊壤烟塵濛敢以斧斤入
宮樹龍鱗一片鮮血紅忽然驚風掣地起若有轟雷
殷半空羣盜相顧盡獸駭不覺叉手仍鞠躬樹木尚
爲神靈護枝葉皆與造化通從此驕虜折凶圖咸識
聖人樹立雄蒼髯屹然四百年鐵山扶桑相始終
嗚呼欲知當日櫛沐開創功須看金積絳紗籠中有
十三羽箭一角弓

讀書堂

在咸興東十五里
歸州洞雪峯山下

讀書堂歸州洞裏雪山陽伊昔東方 聖人作聰明
神武似禹湯天縱生知不自聖詩書六藝學無方茅
屋數間山之中層巖爲屏土爲床石茸之峯丰茸若
出雲下有飛瀑琮瑋響瓊琅玉音高亮滿天地龍在
壑吟兮鳳鳴岡天經地緯入範圍雲漢下垂昭回光
文以得衆武定功天乃畀以三韓王靈奎珠綴耀析
木瑞日雲擎升扶桑維時中國屬大明同文萬里通
車航洪武二十五載卽壬申一似檀君戊辰並陶唐
羅麗以來數千年鴻濛始鑿開滄荒聲明文物軼華
夏一代制作何輝煌大冠長裾仍潤袖周旋揖讓巧
趨蹌家絃戶誦習簞簞八域盡化鄒魯鄉漢唐詩賦

洛建學名儒碩師項相望竈婢亦耻再更夫馬廐皆
行三年喪嗚呼盛哉自有東方未曾有文章煥乎周
與商劉家舊豐唐晉陽不聞當時有書庄滄海爲硯
兮白山爲筆神功何以大鋪張惟有舊堂巋然山海
間年年春到百花滿地香

臨溟大捷歌

臨溟驛在城津吉州間鄭評事文
孚壬辰大破倭奴於此有勝戰碑

鄭評事奇男子微爾盡黔北人齒時有長鯨怒鬣閃
燿若火幟滄海爲沸東天紫三京焚燒八路崩翠華
遙遙鴨水止其酋清正最黠驚萬隊橫行遂北指快
劍如霜彗日芒毒丸如雷洞人髓元戎旆折鉄嶺上
三軍潮退未敢發一矢烏言卉服滿朔野腥氛慘愴

興王里磨天重險掉臂過九鎮諸郡望風跪桀奴叛
吏爭倒戈處處翻城囚長吏王子大臣亦受縛國何
汝負乃忍爾箕封千里爲戎矣關北曾無一義士維
時蓮幕隻身跣山行草伏形容毀彷徨歧路誰與歸
邂逅同志崔姜李揮涕飲血仰天誓一百義旅投袂
起裂裳爲旂鋤爲兵白面將軍杖尺箠鳴鼓徐行入
鏡城士女歡迎唯命俟南樓業業建牙纛磔斮鞠豎
懸街市軍聲一朝震北路叛賊次第束身死番部伺
鸞乍蠢動若崩厥角咸率俾蠻兒聞之卷甲來肉薄
登陴如附蟻城上一鼓箭如雨僵尸盈壕不旋趾官
軍追奔至吉州三戰三北皆離披長坪雙浦數百里

投戈棄鉦何索索驕虜膽破若無骨蝸縮蛇蟠土窟
裏端川大兵自來迎半夜啣枚將南徙草山偃旗截
歸路前有角兮後有倚白塔之原臨溟野健兒賈勇
如虎兇紛紛鼠竄與兔脫徃徃裂腦而折臂髡頭裸
足化京觀長繩簇簇貫左耳割肚擢腸立如堆醜類
狂顧那嚮邇倭酋大哭走踰嶺頭雖戴矣魄已稀陣
雲初霽白榆社血刃淨洗青海水朔方二十有三州
寸地皆還我疆理可憐堂堂二壯士功成身殞馬前
墜蠟紙遙飛奏行在 至聖動容悲且喜璽書寵嘉
進官秩賜賚便蕃及衣履藩臣擁兵但自衛 君父
蒙塵越人視奈何耻已無功嫌人有媒孽其短反拚

美公議百年竟得伸贈誅輝煌邦人祀武溪之上禦
亂里山川鬱鬱環古壘昔日金尹拓疆土國威兵力
是憑倚公遭板蕩奮空拳屹若狂瀾障一砥不然不
惟豆江以內非吾有荐食上國從此始如公樹立更
卓然千載睢陽可並擬生前落拓死時煩冤俱莫恨
巍巍名與白山齊高峙我過戰地起感慨彈劔長歌
爲變徵彈劔歌聲激烈邊風獵獵鳴不已

莫斬鷄

鄭東溟爲北評事夜賦詩推敲未定聞鷄鳴
使人捉鷄數之曰吾詩未成爾何敢先鳴遂
斬之南藥泉記其事

莫斬鷄鷄實無罪公詩遲兮始公來時聞公名雄辭

謂與古人齊滄溟時見舞蛟螭荒塞爭覩耀壁奎不
數子建七步成何讓謫仙百篇題異哉今之隱几非
昔時日之夕矣初上棲神思戛戛抽不得吟肩屢聳
還復低疎髯撚盡口唇乾星斗闌干風雨淒得非眠
如鶴無乃醉似泥東方欲曙可奈何依舊窓前盡意
啼公乎何不思量反嗔我磨刀霍霍捉將如羊剗公
詩未就何預我我是微物誠莫知其端倪鴈有不鳴
烹我以鳴見怒鳴耶不鳴若之奚或者下劣詩魔入
公肚何不用健筆揮斤如鱗谿我有長距與利觜爲
君搏之啄之共排擠君不聞文章巧拙不在淹與速
左思十年藩牆筆研携當時若罪喔咿聲東家鷄盡

骨成堤

白雲白

白雲白白雲白我髮何如雲雪色雲在天兮雪在山
白髮崢嶸滿我額白雪一遇春風散白雲須臾變蒼
碧我髮一白何時黑髮白無有疾痛與害事其奈兩
脚俱軟牙齒落脚軟不能登山齒落不能嚼硬肉
登山尚有輿擔負硬肉猶待烹爛熟最是雙瞳忽生
花如烟似霧來遮隔晝陰不得作小字夜燭不得看
細畫百家點刪將罷遣六經箋註漸難讀平生嗜好
忍捨擲此心安得不落莫當風自淚向日羞閉睫時
如僧面壁五十始過便如此六十七十斷可識歲不

我與老更促縱使百年如過隙昔聞野老有恒言死
不足悲老可感少日過耳若不聞身親當之今乃覺
老可感可奈何日月亦有盈與昃人生何獨如金石
從古聖賢骨已灰至今精神留赫赫我目雖昏心不
障蛟胎鬼膽猶抉剔我身雖老氣不摧龍門碣石可
劈跖馬能局促效轅駒有時發憤忘寢食欲學豎亥
逐日步願借大鵬垂天翼上攀無倪下無底東略扶
桑西若木百世在前千劫後男兒事業無窮極直到
蓋棺乃得已眼前寸晷真可惜胡爲乎徬徨半途不
努力獨不聞衛武公九十五歲猶賦抑莫嗟髮白如
雲雪且復高歌引大白

射龍臺

赤池何在咸池東紫貝之闕珠爲宮波浪近接豆江
濶孔穴下與瑟海通爰有神物宅其中河伯海若失
網紀異族跋扈來爭雄黑鱗兮玄甲叱咤列缺驅豐
隆客強主弱勢不敵乘雲上訴蒼蒼穹帝命北海神
禹強禹強喝呵久無功天乃震怒授乾符曰汝假手
東王公翩然啣命下箕躔半夜幻成白衣翁恍惚來
入 聖人夢稽首乞靈禮貌恭排患禁暴奮高義詰
朝帶矢登南峯矯如鄭門方酣戰蜿若中天交雙虹
不辨客主那輕發悵望半日還攷弓是夜神翁更來
告黑者是寇白者儂公能終惠我必報後世福慶應

無窮玉趾再舉回重瞳黑雲如山天晦蒙金僕姑飛
碎尺鱗立黃血化池面紅怒鬣崢嶸尾擊水驚雷勻
磕口生風俄頃雲散浪花定其角戢戢走喁喁龜魚
舞躍龍返淵天開日晶氛翳空大澤斬蛇靈識吓淖
陽射蛟神武同于今赤池之水青如藍射龍臺上氣
籠葱析木精垂降神孫滄海雲蒸送真龍君不見屈
伸浦飛砂抉石留遺蹤

朔風行

昨日風今日風朝朝暮暮號怒聲何雄一月二十九
日風一日不風天濛濛揚沙走石相撞擊屋瓦翻飛
飄半空樹木摧殘矮短仍拳曲江邊一帶山皆童厥

土惟有赤桺黃榆生棺槨棟椽安得栢與松厥俗大
戒在失火家家曲突剝木立烟筒行人道上不能頂
戴笠塵埃撲目迷西東流澌滿江雪助威掀山碾壑
來隆隆窸窣蓬勃起何處熟孰使之然鳴不窮得非大
塊决裂土囊口或是太陰震撼箕伯宮老夫骨瘦最
怯風終日下簾塞窓櫺耳邊常如雷咆吼徃徃咫尺
語不通年來眼花北來添視物不快多朦朧如今聽
官漸失守更恐自此成全聾聰明盡廢空皮殼白首
長作塞上翁三春已暮不見青草色惟見寒山獵火
紅遙憶故園洛陽裏百花應滿舊時叢

夏雪歌

孟夏之月月月初缺豆滿江上天雨雪雪花漫空大如
毬坑谷盡平江岸沒陰山草木忽化白飛鳥凍墮蛇
入穴老夫背上襲厚纈煖室猶怕寒颯骨是月於卦
爲純乾朱明火德方按節如何滕六反用事恠底氣
候太乖刺正月繁霜昔有詩人歎况復積雪風栗烈
百卉具腓猶尚可其奈兩麥方穉將盡殺土人來告
官莫憂此地風氣本殊別白頭山色四時白居民六
月猶裘褐北人織布南人服當暑罕有衣輕葛此時
下雪徃徃有五穀不害秋有實今年春盡尚無雨四
野槁剛犁不墾是雪亦能潤土脉功比甘露三之一
耳牟着根麥抽芽低可播稷兮高畊秫百果不成何

足患地無桃李梅杏柿棗栗聞此聊以寬民憂不覺
茫然而自失天地至大造化竒千變萬殊難究詰夏
蟲不可語水蜀犬或有吠日裸壤之民不知寒火山
之鼠不識熱物理顛詭無不有曲見褊聞那能悉嗚
呼歷象授時久不驗羲和已遠吾誰質

塞上吟

朝飲豆江水暮食赤池魚水從白頭山頂來魚是渤
海波臣餘晝彈匣中劍夜讀丌上書劍有跨海斬鯨
氣書窺先天未畫初腰縮虎符食廩米簾閣沉沉是
官居閉印廢衙一事無癡坐不動如蘧篋出關頗似
班定遠行吟初非屈三閭已見塞月幾圓缺長對隴

雲自卷舒文章變態神應助奇氣昂藏老不除白首
飄零不知愁何賴腹中藏五車長歌短咏謾自勞落
拓嶽崎竟誰如得非潮州刺史乎無乃永州司馬歟
爾衣何華聲何清宛如雲錦之裳佩瓊琚古人已遠
不可攀今人應笑我狂踈身之不謀反好古嗚呼爾
真狂也且君不聞天爲宇兮地爲席海內孰非吾之
廬又不見鳥鳴春兮虫吟秋天機何獨不在予

端午篇

昔年端午厠近侍龍池授簡獻帖子長句短聯寓祝
規金榜畫楮迎和氣綵勝艾人白貼扇紫衣雙擎來
宣賜年年應製幾霑恩至今天香留弊笥鼎湖飛龍

忽九霄子車鍼虎遲一死今年端午滯北塞君門
遠隔三千里眼中長對不咸山耳邊惟聞豆江水半
夏已生鹿角解飛雪騰空鴈不至天中佳節徂天涯
日邊消息有誰寄延和門外待漏時往事依依發宵
寐紅葉欄頭誰載筆花甌影裏宛曳履魂夢一劫倍
愴恨河漢三更起徙倚孰謂白日遠朝朝出旭當簾
几孰謂北斗高夜夜垂光如咫尺惟是西方美人望
不見玉樓迢遞何處是一別經歲又經春東流不盡
相思淚

海棠花歌

北方春盡不見見花海棠初開江上之白沙老夫病起

強出門小輿逶迤踏晴莎初如地上鋪紅錦更似水
面凝彩霞綠葉剡枝紛婀娜絳唇金鬚拆天葩香何
酷烈肺自清色何炫爛顏欲酡楊妃睡罷態正濃鉛
朱黛綠半歌斜姚黃是弟魏紫兄肯數薔薇與山茶
不意絕海窟磧產竒卉無乃扶桑析木畱精華手折
一枝欲挿冠却媿繁紅笑我兩鬢皤花兮莫笑我鬢
皤少年意氣猶未盡消磨尚堪騎馬馳大漠且能痛
飲作長歌爾何不向清洛之陽曲江頭烟月春風共
婆娑同我流落天一涯苟不與天樨穠李爭妍而競
媚花兮花兮奈爾何

思美人曲

思美人在長安春風桃李滿城香金樽寶瑟清且閑
去歲別君兮白玉樓前文石欄今來憶君處青海之
頭黑水灣候鴈不過嶺白雲空在山四月飛雪不見
花朔風如箭吹骨酸憶君夜夜魂飛揚夜短難度鬼
門關昔我來時木葉黃謂花發與君還流光冉冉不
相待三春已徂夏將闌腰帶日減圍髮毛日生斑腰
減尚可待加餐髮斑那得更朱顏我心如石不可轉
君門如天不可攀山多猛獸兮川無梁欲往從之無
羽翰一月三十日一日十二時思君如連環千回萬
周苦無端

黃山遊歌

豆江外十餘里地有山尖圓立野中色常黃
故土人謂之黃山其下有三大池產真珠即
八池之三也每冬春間清明時黃山忽騰湧
上浮半空峯巒樹木宛成樓臺人物旗幟車
馬之狀奇形怪態變幻千
百良久之乃滅俗稱山遊

黃山遊千峯裊裊碧空浮碧空浮瑟海爲尾兮豆江
頭軒然若大鵬垂翼而扶搖蜿然若蒼龍乘雲而摻
流峩峩兮千官環立奉圭璋騰騰兮萬兵森列橫戈
矛燦如羣星駭鸞擁芝蓋儼如上帝臨朝垂玉旒霓
裳寶髻三千女璇檻瑤窓十二樓紛合沓兮隱復見
或連蜷兮去還留黃山遊不是玄圃是瀛洲羽衣飄
颻何處來無乃王喬與浮邱又如長鯨噴白雪洪濤
出沒蕩輕舟忽然芳草滿平蕪髣髴走馬而擊毬翕

歛變化形莫狀奇詭章皇畫難侔俄日昇兮風捲倏
霧罷而煙收黃山遊下有八池綠如油五色芙蓉鋪
錦繡萬顆明珠綴琳球金塘之野聖人居天造地
設開奧區靈氣薰蒸啓三韓聲明物采映千秋至今
撫洲江上望異事流傳入村謳

夜宿朝日軒城津客舍

海上孤峯一髮橫臺隍包絡水軍營滄波萬里樓迎
日元氣千年石護城舟楫影交簾外過魚龍聲入枕
邊鳴溟翁八詠何人續長嘯憑欄起遠情

還登摩天嶺

卓立雄蟠誰與徒翛然雲外一長吁山當北斗爭高

下水並青天混有無開鑿何年勞鬼斧扶搖六月化
鵬圓登臨便覺蓬萊近來日關河又載驅

重登咸關嶺

去歲雪中出北關今年花發始南還列州二十皆濱
海官路三千半鑿山危棧踏來仍急水摩雲過了又
凋顏卽今周道平如坻行旅休歌蜀道難

登樂民樓

漢沛周岐尚有村龍盤虎踞勢騰奔山從白嶽分千
脉水到滄溟會一門駿馬雲屯同冀代雄城碁布壯
藩垣如今萬歲橋前路惟有笙歌日夕喧

又

高樓百尺壓江渚遠客登臨有所思天地北南開戶
牖山河表裏大城池英雄過去風流盡行路間關歲
月遲一曲離歌相送罷汀花如繡柳如絲

耳溪散稿卷之二終



